



# Ալեքսանդր Ճատուրյան

## Առաքյալ

Խոսի՛ր, առաքյալ վեհ ճշմարտության,  
Քանի չեն փակվել քո սուրբ շրթունքներ.  
Անարգի՛ր «եսը» գոռոզ մարդկության,  
Հարվածի՛ր անխնա նորա չար գործքեր...

Թո՛ղ նա կատաղի, որպես փոթորիկ,  
Կարկուտ ու հեղեղ թափե քո վերան,  
Դու այդ համարիք մի անգոր ալիք,  
Եվ ազատ քայլե՛ քո փշոտ ճամփան...

Մարտնչի՛ր անվախ, որպես քաջ զինվոր,  
Անկաշառ խոսքի դրոշակը ձեռքում.  
Եվ մի՛ վհատիր, թե դու էլ մի օր  
Պիտ ընկնես կյանքի գոռ պատերազմում:

Այո՛, դու կընկնես և քո անշունչ դին  
Մայր-երկրի կրծքում փոշի կըդառնա,  
Բայց քո վեհ քարոզ, քո հպարտ հոգին  
Հավիտյան կապրեն աշխարհիս վերա:

Եվ անվերջ դարեր քո հրգոր բարբառ  
Կը հնչվի ազատ, ահեղ թնդյունով.  
Նա կըխորտակե մահաշունչ խավար,

Մեզ անշեջ լուսո տաճար կանգնելով...

1889, 1 փետրվարի